

Pokrenuta je globalna inicijativa za podizanje svijesti o 15 miliona beba koje se prijevremeno rode svake godine. Poznati su nam neki od uzroka, ali to nije dovoljno da se bebe zaštite od smrti ili invaliditeta, zato što su rođene prerano. Sada postoji globalni poziv na akciju za rješavanje misterije prijevremenih rođenja.

Henri Rek je baš kao i svaki drugi aktivni trogodišnjak. On voli da se igra sa svojim bratom Oliverom i svojim ocem Polom. Također voli da sluša priče koje mu čita njegova majka Sara.

Prije tri godine, on je bio veoma mala beba, i borio se da preživi. I dok je Henri preživio, njegov mali brat po imenu Benet, koji je također rođen prijevremeno - nije. "To je nešto što nikada ne možete da zaboravite, o čemu mislite svakodnevno", kaže Sara Rek.

Prijevremena rođenja su vodeći uzrok smrti novorođenčadi ili kasnijeg invaliditeta. Prijevremeno je svako rođenje prije 37. sedmice trudnoće. Istraživanja su pokazala da što manje vremena beba provede u materici, zdravstveni problemi će biti ozbiljniji, ukoliko dijete preživi.

Prerano rođenje može da izazove oštećenje mozga, kao i probleme sa vidom, sluhom i disanjem. Henri ima hronično oboljenje pluća. Prošlog proljeća bio je u bolnici zbog upale pluća. "Zbog tog hroničnog oboljenja pluća, zime su veoma teške za Henrija i za nas", priča Sara Rek.

Dr Alan Gutmaker je na čelu istraživanja prijevremenih rođenja, na Nacionalnim institutima za zdravlje. "Mi zaista ne poznajemo većinu uzroka prijevremenih rođenja i zato ne možemo da ih uspješno spriječimo".

Genetika može da igra ulogu. To je bio faktor rizika za porodicu Rek, ali tu su i druge stvari. Dječaci imaju veće šanse da budu ranije rođeni nego djevojčice, ali ipak niko ne zna zašto.

Kako bi riješile problem prijevremenog rođenja, globalne zdravstvene organizacije odlučile su da koordinišu istraživanje. "Mislimo da je sada pravo vrijeme za bolje objedinjavanje napora, dijelom, na visokom nivou, zato što posjedujemo naučne metode kako bi odgovorili na takvu vrstu pitanja na koje ranije nismo mogli", kaže dr Gutmaker.

Organizacija "March of Dimes" zauzela je vodeću ulogu. Dr Edvard Mekejb je na čelu istraživanja te organizacije. "Petnaest miliona beba u svijetu rodi se prije vremena. Milion od njih će umrijeti. Mi želimo to da promijenimo".

Zato Sara Rek otvoreno govori o svemu tome. "Nadam se da će za desetak godina, šta god da se dogodilo sa Benetom, biti samo jednostavna procedura, nešto što može da se popravi, tako da ljudi neće morati da prolaze kroz teške trenutke".

Izvor: VoA News

[www.medicina.ba](http://www.medicina.ba)

16.12.2013.